

ЎЗБЕКИСТОН РЕСПУБЛИКАСИ ПРЕЗИДЕНТИНИНГ  
ҚАРОРИ

**646 Туризм соҳасини ривожлантиришда маҳаллий ижро  
этувчи ҳокимият органларининг масъулиятини яна-  
да ошириш чора-тадбирлари тўғрисида**

Ҳудудларнинг сайёҳлик салоҳиятини дунёга кенг тарғиб қилиш, мамлакатимизга ташриф буюриши кутилаётган сайёҳларга қулай шароитлар яратиш, соҳадаги мавжуд муаммоларни тизимли асосда бартараф этиш, ушбу вазифаларни амалга оширишда жойлардаги маҳаллий давлат ҳокимияти органларининг масъулиятини ошириш ҳамда туризм соҳасини янада ривожлантириш мақсадида:

1. Ўзбекистон Республикаси Иқтисодиёт вазирлиги, Туризмни ривожлантириш давлат қўмитаси, Хоразм, Бухоро, Самарқанд ва Тошкент вилоятлари ҳокимликлари ҳамда Молия вазирлигининг Хоразм, Бухоро, Самарқанд ва Тошкент вилояти ҳокимларининг туризмни ривожлантириш масалалари бўйича ўринбосарлари лавозимларини жорий этиш ва уларнинг котибиятларини ташкил қилиш тўғрисидаги таклифлари маъқуллансин.

2. Қуйидагилар вилоятлар ҳокимларининг туризмни ривожлантириш масалалари бўйича ўринбосарларининг асосий вазифалари этиб белгилансин:

худудда туризм соҳасида давлат сиёсатини амалга ошириш, соҳа бўйича қабул қилинган концепция ва дастурларнинг ижросини таъминлашга қаратилган тадбирларни белгилаш;

чет эл мамлакатлари билан туризм соҳасида, айниқса, туристлар оқимини кўпайтириш ҳамда уларни жалб қилиш бўйича ҳамкорлик ва келишувларни ваколатли органлар билан биргаликда амалга ошириш;

соҳани чуқур таҳлил қилиш асосида туристик хизматларга бўлган талабни ўрганиш, бу борадаги мавжуд муаммолар ва тўсиқларни аниқлаш, соҳани ривожлантириш ҳамда такомиллаштиришнинг мақсадга мувофиқ моделларини ишлаб чиқиш ва келгуси режаларни белгилаш;

туризм соҳасининг иқтисодий, экологик, ижтимоий, маданий ва бошқа

йўналишлардаги инфратузилмасини такомиллаштириш ва туризм йўналишидаги диққатга сазовор жойлар, уларни яхшилаш бўйича аниқ чора-тадбирларни белгилаш ҳамда амалга ошириш;

кўшимча туризм маршрутларини ишлаб чиқиш, чет эл ёшларини кенг жалб этиш мақсадида кўнгилочар комплекслар барпо этиш, маданий мерос объектларида халқимизнинг тарихи, турмуш тарзи, урф-одатлари, анъаналарини ўзида акс эттирган экспозицияларни ташкил этиш;

туризм соҳасида туризмни ривожлантиришнинг ҳудудий дастурларини ишлаб чиқиш ва амалга оширишни мувофиқлаштириш;

туризмни ривожлантириш масалалари бўйича масъул вазирлик, идора ва қўмиталарнинг ҳудудий бошқармалари иш фаолиятини мувофиқлаштириш;

туризм соҳасига замонавий ахборот-коммуникация воситаларини жалб этиш, хорижий туроператорлар ва оммавий ахборот воситалари билан ҳамкорлик қилиш орқали республиканинг мавжуд сайёҳлик салоҳиятини кенг ёритиш чораларини кўриш.

3. Хоразм, Бухоро, Самарқанд ва Тошкент вилояти ҳокимликлари Ўзбекистон Республикаси Туризмни ривожлантириш давлат қўмитаси билан биргаликда жорий этилаётган вилоят ҳокимининг туризмни ривожлантириш масалалари бўйича ўринбосарининг функционал вазифалари ва уларнинг котибияти тўғрисидаги низомларни бир ой муддатда ишлаб чиқиб, тасдиқласинлар.

4. Ўзбекистон Республикаси Президентининг Давлат маслаҳатчиси У.С. Исмаилов ва Ўзбекистон Республикасининг Бош вазири А.Н. Арипов жорий этилаётган лавозимларни пухта махсус билимларга, юқори касбий маҳоратга эга бўлган, чет тилларини яхши биладиган, тажрибали ва малакали кадрлар билан тўлдириш юзасидан бир ой муддатда таклиф киритсинлар.

5. Ўзбекистон Республикаси Президентининг «Маҳаллий ижроия ҳокимияти органлари фаолиятини янада такомиллаштириш тўғрисида» 2016 йил 22 декабрдаги ПҚ-2691-сон қарорига иловага мувофиқ ўзгартиришлар киритилсин.

6. Мазкур қарорнинг бажарилишини назорат қилиш Ўзбекистон Республикасининг Бош вазири А.Н. Арипов ва Ўзбекистон Республикаси Президентининг Давлат маслаҳатчиси У.С. Исмаилов зиммасига юклансин.

**Ўзбекистон Республикаси  
Президенти**

**Ш. МИРЗИЁЕВ**

Тошкент ш.,  
2017 йил 12 июль,  
ПҚ-3129-сон

Ўзбекистон Республикаси  
Президентининг 2017 йил 12 июлдаги  
ПҚ-3129-сон қарорига  
ИЛОВА

**Ўзбекистон Республикаси Президентининг  
«Маҳаллий ижроия ҳокимияти органлари фаолиятини  
янада такомиллаштириш тўғрисида» 2016 йил 22 декабрдаги  
ПҚ-2691-сон қарорига киритилаётган ўзгартиришлар**

1. 1-илованинг матни қуйидаги таҳрирда баён этилсин:

## «Вилоят ҳокимликлари бошқарув аппаратининг НАМУНАВИЙ ТУЗИЛМАСИ



Бошқарув ходимларининг чекланган сони — 50 — 55 нафар.

\* Бошқарув ходимларининг чекланган сони ҳудудларнинг тоифасидан келиб чиққан ҳолда белгиланади.

\*\* Хоразм, Бухоро, Самарқанд ва Тошкент вилоятларига тегишли.

2. 26-илова изоҳининг учинчи хатбошиси қуйидаги таҳрирда баён этилсин:

«\*\* Кегейли, Миришкор, Чирокчи, Шеробод, Пайарик, Пастдарғом, Ховос, Қизирик, Зангиота туманларига тегишли.»

3. 3-илованинг матни қуйидаги таҳрирда баён этилсин:

**«Вилоятлар ва Тошкент шаҳар ҳокимликлари бошқарув  
аппарати ходимларининг чекланган  
СОНИ**

Т/р	Худудлар номи	Бошқарув ходимларининг чекланган сони
<b>I тоифали худудлар бўйича</b>		
1.	Андижон вилояти	53
2.	Қашқадарё вилояти	53
3.	Самарқанд вилояти*	55
4.	Тошкент вилояти*	55
5.	Фарғона вилояти	53
<b>II тоифали худудлар бўйича</b>		
6.	Бухоро вилояти*	55
7.	Навобий вилояти	53
8.	Наманган вилояти	53
9.	Сурхондарё вилояти	53
10.	Хоразм вилояти*	55
<b>III тоифали худудлар бўйича</b>		
11.	Жиззах вилояти	50
12.	Сирдарё вилояти	50
<b>Тоифадан ташқари</b>		
13.	Тошкент шаҳри**	59
<b>Жами</b>		<b>697</b>

\* Хоразм, Бухоро ва Самарқанд ва Тошкент вилоятларида туризмни ривожлантириш масалалари бўйича ҳоким ўринбосарлари ва котибиятлари (2 нафар).

\*\* Капитал қурилиш бошқармаси (8 нафар), Инвестициялар ва хусусийлаштирилган корхоналарга қўмаклашиш бошқармаси (6 нафар) ҳамда Йўловчи транспортининг барча турлари ҳаракатини лицензиялаш ва мувофиқлаштириш департаменти (40 нафар) ҳисобга олинмаган ҳолда.»

4. 3в-иловада:

а) «Сурхондарё вилояти» бўлимининг «Бошқарув ходимларининг чекланган сони» устунида:

учинчи сатрдаги «21» сони «22» сони билан алмаштирилсин;

**646-647-моддалар**

**— 62 —**

**28 (788)-сон**

«Жами» сатридаги «263» сони «264» сони билан алмаштирилсин;  
б) бир юз эллик еттинчи сатрининг «Бошқарув ходимларининг чекланган сони» устунидаги «3 183» сони «3 184» сони билан алмаштирилсин.